



Эрзямокшонь фольклоронь пурныця

(Л. С. Кавтаськинэнь 100 иень топодемантень)

«Седеем чевтемиль, зярдо вастнилия сонзэ.
Ды свал арсезевелинь, кодат вадря ломанть кассть
минек мокшэрзянь семиясонть, кодамо валдо сынст марто эрямось!»
Л. Васильев

Л. С. Кавтаськин – филологиянь наукань кандидат, МАССР-нь культурань заслуженной работник, СССР-нь Писателень союзонь член, эрзянь содавикс фольклорист, кельстэ кельс ютавтыця, критик, педагог чачсь 1911-це иень февралень 7-це чистэ Самарской областень Похвистневань райононь Покш Толкан велесэ. Тестэ ушодовсь наукас сонзэ кись. Сёрмадомо кармась эйкакшпорасто. 1926 иестэ, кода тонавтнесь Вишка Толкан велень семилеткасо, появасть печатьсэ васенце стихотворениянзо. Седе тов стихензэ, поэманзо, ёвксонзо ды ёвтнеманзо лиснесть «Сятко» журналсо ды эрзянь газетасо.

Лука Семенович эрясь сюпав, неявикс ды теке шкастонть сэтьме эрямо. 1929 прядызе Вишка Толкан велень ШКМ-нть (колхозонь од ломанень школа) ды тусь Ленинградов – Историко-лингвистической институтов. Иень ютазь сонзэ куродызе орма, секс савсь тензэ кадомс тонавтнеманть. 1937-1939 иестэ прядызе А. И. Полежаев лемсэ Мордовиянь государственной педагогикань институтонь филологиянь факультет.

Л. С. Кавтаськинэнь эрямонь ды шкинемань сехте покш пельксэсь сюлмавозь Мордовиянть, сонзэ столицанть Саранскоенть марто. Тев од филологось сась 1933 иестэ. Сон вети тиринь кель ды литература мордовской рабфаксо, строительной техникумсо, Темниковской учительской институтсо.

Мордовиясо Лука Семенович арси алтамс эсь прянтэ устной народной творчествань сюпавчинтень ды тонавтнеманть. Тенень бажамось ветизе келень, литературань ды историянь Мордовской научно-исследовательской институтов. Тесэ важдось 1936 иестэ саезь Ине войнанть ушодомс. Ансяк войнась саекшнызе институтонть эйстэ. Кавтаськин эрямонь апак жаля тюрсь фашистнэнь каршо. Ранявкшнось. Бойтнесэ невтезь смелчинть кис сонензэ максозь правительственной казнеть.


1944-1974 иес Лука Семенович важдось МНИИЯЛИЭ-сэ. Сон кассь пек паро учёнокс. Сехте покш мель явсь эрзянь раськень устной творчествань произведениятнень пурнамонтень. Сонзэ творчествань тевензэ покш ды сюпавт. Фольклоронь сборниктнень нолдамодо икеле эрявсь пурнамс ламо материал ды теемс тензэ научной обобщения. Съкамонзо или ялга марто Лука Семенович ульнесь – ды а весть – минек республикань, истя жо лия областень автономной республикань мокшэрзянь велетнесэ. Сон маштсь кортавомс моронь морыцятнень ды ёвксонь содыцятнень. Велень ломантне вансть лангозонзо, теке эсест раськень культурань кепедицянтэ лангс, кона домкасто содылинзе кезэрень койтнень.

Л. С. Кавтаськин питнейкс ловсь сень, мезе теезель сондензэ икеле ды мезенть теить лият. Лука Семёнович тонавтнилсь мокшэрзянь фольклоронь умонь тонавтницятнень важдодевксэст : рузонь ученоенть А. А. Шахматовонь, финской ученоенть Х. Паасоненэнь, эрзянь ученоенть М. Е. Евсевьевень. Седейшкава лецтнесь А. И. Маскаевень, К. Т. Самородовонь, конатнень марто ламо иень перть важдось научно-исследовательской институтонь фольклоронь секторсо. Лезксэнь кис сакшность тензэ покш ученойткак : И. С. Сибиряк, И. Д. Воронин, Л. Г. Васильев, В. В. Горбунов. Сон вечксь од ломанть, мелявтсь ушодыця фольклористнэнь касомаст кувалма, маштсь кирвастеме сынст вийтнес кемемань тол. Лембестэ вансь Мордовиянь од фольклористнэнь

– А. Г. Борисовонь, А. Г. Самошкинэнь, М. Ф. Ефимовань, Э. Н. Таракинэнь, В. И. Костинэнь, А. Д. Шуляевонь, А. М. Шароновонь, Е. Л. Ховринэнь, Л. И. Седовань тевест мельга, лездась тенст, кеняркшнось изнявксоост кувалма.

Кирдсть ялгакочи ученоенть марто эрзянь содавикс прозаиктне ды поэтнэ А. Моро, А. Щеглов, А. Куторкин, П. Любаев. Лука Семёнович аволь ансяк тонавтнесь народнтэнь устной народной творчестваст. Одсто, кода уш лектинек, сон сёрмалесь стихть. Мейлеяк паро мельсэ вансь мокшэрзянь литературанть касоманзо мельга, сёрмалесь критической статьят, мокшэрзянь прозань эрва иень обзорт.

Л. С. Кавтаськин эрямонзо перть сёрмадсь 50 ламо научной важедевкст. Весе сынь кандсть покш лезэ эрзянь финно-угорской наукантень. Сынст ютксо башка эрывать тешкстамс васняк фольклорной сборниктнень : «Эрзянь фольклор» (1939), «Мордовские народные песни» (1955), «Эрзя-мокшонь морот, сказт ды балладат» (1958), «Устно-поэтическое творчество мордовского народа» Т. 1., «Эпические и лиро-эпические песни» (1963), «Устно-поэтическое творчество мордовского народа» Т. 7, ч. 2. «Эрзянские причитания-плачи» (1972). Пек питнейть Л. С. Кавтаськинэнь теоретической важедевксэнзэ, эрвась эйтэст – од вал наукасонть : «Андрей Ёндогонь творчествандонзо» (1936). «Кода ды мезде сёрмады Н. Эркая» (1937), «Заметки о мордовских загадках» (1947), «К вопросу истории собирания, публикации и изучения мордовской необрядовой поэзии» (1953), «Эпические и лиро-эпические песни мордовского народа» (1963), «Мордовские обряды и причитания при похоронах девушки» (1972), «Мордовские причитания и плачи»



Ламо тейсь Л. С. Кавтаськин кода редакторгак. Сонзэ покш таликазо М. Е. Евсевьевонь ды И. С. Сибиряконь фольклоронь материалтнэнь печатьс анокстамосо, эрзянь ды мокшонь эпосонь академической изданиянт пурнамосо.

МР-нь А. С. Пушкинэнь лемсэ Национальной библиотекасонтъ национальной ды краеведческой литературань отделсэнтъ пурназь покш выставка, кона алтазь Лука Семенович Кавтаськинэнь чачома чистэнзэ 100 иетнень топодемантень. Тесэ невтезь эрзянь фольклоронь ёроков пурныцянтъ ды ученоенть весе важедевксэнзэ. Сынть стяко апак путо книгань полка лангс. Эрва чистэ сыть библиотекав школасо тонавтницят, студентт, вузонь ды школань тонавтыцят, сайт лезэв превть-содавкст книгастонзо. Весе неть книгатне – эрзянь культурантень покш путовкс. Сынть кармить эрямо пингед пингес.

Анокстызе В. Б. Бояркина

МР-нь А. С. Пушкинэнь лемсэ библиотекань национальной ды краеведческой литературань нупалень библиограф.